

Bun per la biodiversitad ed il patrimoni cultural

Il rapport da lavur dal FSC 2015/2016 è cumparì (bulletin dal FSC nr. 50)

■ **(cp) Var 230 projects en connex cun la tgira da cuntradas cultivadas en accord cun la natira ha il Fond Svizzer per la Cuntrada FSC pudì sustegnair ils ultims dus onns e quai cun totalmain 10 milliuns francs.** Questas cifras resortan dal pli nov rapport da lavur dal FSC. El cumprova a maun da projects sustegnids co ch'il FSC gida a promover la biodiversitad. Ses engaschi sa cunfa però er optimalmain cun l'Onn europeic dal patrimoni cultural 2018 ch'è da gronda impurtanza per l'avegnir dal FSC.

Dapi sia fundaziun a chaschun dal giubileum da 700 onns confederaziun il 1991 ha il FSC pudì promover già passa 2400 projects en tut las regiuns da noss pajais. Cun ils 145 milliuns francs impundids èn vegnidas messas en moviment investiziuns d'ina mesa milliarda: per mantegnair la valor, revalitar e refar cuntradas bellas ed ecologicamain impurtantas. En quatter onns però va quest engaschi definitivamain a fin – nun ch'il parlament federal prolungheschia las basas legalas limitadas fin l'onn 2021 e prendia novas decisiuns da finanziaziun per il FSC.

L'onn 2018 dovri las emprimas decisiuns

Tenor questa finamira sa drizzan er ils artitgels da princip dal rapport da lavur 2015/2016 ch'è cumparì sco numer 50 dal bulletin dal FSC: la presidenta dal FSC Verena Diener declera che l'engaschi dal FSC per cuntradas cultivadas en accord cun la natira saja zunt necessari er en l'avegnir – e co che quest engaschi già maun en maun cun la promoziun da la biodiversitad, la varietad da spazis viduals, da plantas e da spezias d'animals. Cun buna raschun èsi stà previs il 2015, en il project preliminar da la confederaziun per in plan d'acziun Biodiversitad, d'amplifitgar il FSC per rinforzar quest effect. Ils chantuns ch'èn da lezzas uras vegnids consultads han sustegnì fermamain quest'idea.

Tenor la presidenta dal FSC è quai «tuttavia ina buna situaziun da partenza per il process da decisiun che sto entschaiver uss en vista a la decisiun dal parlament federal ch'è necessaria per garantir l'avegnir dal FSC».

L'engaschi dal FSC en il chantun Grischun

En il chantun Grischun ha il FSC sustegnì ils davos dus onns 24 projects cun totalmain 730 000 francs. Dapi sia fundaziun il 1991 ha il FSC promovì en il Grischun 236 projects cun totalmain 17,3 milliuns. En la glista da rangaziun dals chantuns sa chatta il Grischun quai che pertutga l'engaschi dal FSC, suenter il Tessin e davant il Vallais, sin piazza dus. Per ch'il FSC possia cuntinuar cun ses engaschi era suenter la limitaziun valaivla (mez dal 2021) ston vegnir instradads ils proxims mais pass concrets per ch'il parlament federal possia prender l'auter onn emprimas decisiuns. Quel termin sa cunfa bain cun l'onn tematic europeic che duai render attent il 2018 er en Svizra al ritg patrimoni cultural. Da quel fan part era las cuntradas cultivadas ed elements classic da la cuntrada (sco mirs sitgs) ch'il FSC vul mantegnair.

Projects promovids en tut la Svizra

En sia contribuziun exprima la presidenta dal FSC Verena Diener sias spetgas ch'il parlament federal vegnia a sustegnair la cuntinuaziun dal FSC, tant pli ch'el ha creà sez il fond l'onn 1991 sco «regal da giubileum» per la festa da 700 onns confederaziun. In pli grond basegn d'agir vesa l'anteriura cussegliera naziunala, cussegliera guvernativa e cussegliera dals chantuns da Turitg en la revalitaziun da la cuntrada en las aglomeraziuns. Projects correspundents na gjajan en quel cas betg mo a favur da la biodiversitad, mabain er a favur dals umans che tschertgian en lur vischinanza recreaziun ed experientschas en la natira.

Il vicepresidente dal FSC Hansjörg Hassler vesa, sin fundament da sias experientschas sco pur da muntogna e president d'in parc natural regional, bunas raschuns pertge ch'ils commembers dal parlament federal che derivan dal sector agricul u en general da cuntradas ruralas duajan sustegnair activamain ina prolungaziun dal FSC: «Il FSC sto er en l'avegnir pudair surpigliar in'impurtanta rolla, sche nus lain mantegnair nossas cuntradas cultivadas da gronda valor.»

En il rapport da lavur 2015/2016 – cumparì en furma dal bulletin dal FSC nr. 50 – preschentan tschintg ulteriurs commembers da la chmissiun dal FSC intgins projects promovids. Cun fotos vegnan illustrads ulteriurs exempels per l'engaschi dal FSC en praticamain tut ils chantuns. Cumpletta vegn il rapport da lavur cun da tuttas sorts indicaziuns, tabellas e graficas statisticas e cun in engraziament drizzà a fundaziuns privatas, chantuns, vischnancas e persunas privatas che han procurà per ulteriurs meds finanzials per il FSC.

Vuschs prominentas davart il FSC

Ultra da quai han intginas persunalitads svizras da renum respundì curtamain a la dumonda, tge che muntia per ellas natira e cuntrada e l'engaschi dal FSC, per exempel:

«*Il contesto del paesaggio e la cura del territorio stanno assumendo sempre più un aspetto importante.*»

(Mario Botta, architect)

«*Nous sommes vraiment privilégiés d'avoir de si beaux paysages alors protégeons-les!*»

(Timea Bacsinszky, giugadra da tennis)

«*In den naturnahen Kulturlandschaften stecken Traditionen, die es zu bewahren gilt. Es ist gut zu wissen, dass der Fonds Landschaft Schweiz sich dieser Aufgaben angenommen hat.*»

(Fredy Knie junior, directur da circus)